

I nun es simpel da chattar persunal qualifichà

Sül sector da chüra es il marchà da persunal illa regiun exhaust

I dà in ögl: Circa la mità dal persunal pro ospidals, centers da chüra etc. nun es indigen.

Cha quai nun haja però dachefar nüglija culla paja o cullas pretaisas decleran perits in chosa.

MARTINA FONTANA

Tant Verena Schütz, la directura da la gestiun «Chüra – Pflege und Betreuung» chi suottastà al Center da sandà Engiadina Bassa (CSEB) e Joachim Koppenberg, il directer dal CSEB, vezzan cun ögls realistics la situaziun dal persunal sül sector da chüra. «Quia pro nus vegnan üna gronda part da las fliunzas e dals fliunzas aint dals cunfins talians, voul dir impustüt dal Tirol dal süd», declera Schütz. Ultra da quai s'ingascha eir adüna darcheu persunas diplomadas dad oters pajais europeics. «Ma i nu resta oter co da far quai», intuna eir Koppenberg. Chi saja bod impussibel da chattar persunas indigenas chi han imprais ils mansters da chüra e da fliamaint e cha la gliued dvainta hoz plü veglia e sto gnir fliada plü lönch. «In Engiadina Bassa vaina circa 8000 abitants e da quels imprendan bier massa pacs mansters sül sector da chüra o da medicina per cuernar il bsögn. A far oura il quint quants giarsuns cha quai sun minch'on es simpel – nempe pacs o bod ingüns», argumtescha Schütz ün dals motifs principals per la mancanza da quel sector da persunas. Implü daja in tuot il Gri-

schun üna gronda concurrenza da las instituziuns da sandà chi tscherchan persunal qualifichà.

Müdamaint eir al timun

La fluctuaziun da persunal da chüra illas differentas instituziuns es tenor statisticas svizras plü grond co in oters mansters. «I s'ha la pussibilità da lavurar in bliers lös e blieras giuvnas e giuvens vöglian eir gnir a cugnuscher il muond ultra dals cunfins da la regiun e da las sportas oura», decler'la. Cha tenor quella statistica stetta la regiun Engiadina Bassa però amo bain: «Intant ch'in tuot il pajais cumpiglia la fluctuaziun circa 25 pertschient es ella pro nus s-chars 20 pertschient.» Dat in ögl ha il müdamaint da persunal eir pro la gruppa da Chüra Röven 8 a Zernez. «In üna gestiun nouva daja normalmaing daplü müdamaints fin cha tuot ed impustüt il team es giovà aint», declera Schütz. Per la fin da quista stà daja müdamaints eir illa gruppa da chüra a Zernez: Erica Riner, la quala s'ha ingaschada a Zernez daspö ils duos ons cha la chüra exista, banduna sia piazza da lavur. «Per ella vain nus chattà üna successura chi ha grond'esperienza, cugnuscha fingià l'andamaint da la gruppa e seis abitants», infuormescha Koppenberg cun tschera cuntainta. Cha quella persuna nun es indigena – nu fa davo las infuormaziuns survgnidas, star stut: «Scha clappessan persunas indigenas chi vöglian lavurar pro nus, ans lichessan per uschè dir giò tuot ils desch daints dal man», conclüda'l. Però perfin illa chüra Röven 8 a Zernez vegnan uossa scolats duos giarsuns sül sector da fliamaint e chüra. «Da spordscher piazzas da giarsunadi es quai cha nus pudain



Joachim Koppenberg e Verena Schütz s'ingaschan pel Center da sandà Engiadina Bassa e pel bainstar da lur persunal. fotografia: Martina Fontana

contribuir per amegldrar la situaziun sül marchà», declera Koppenberg ed intuna cha'l CSEB spordscha in tuot sias sportas blieras piazzas da giarsunadi e cha quellas vegnan eir promovüdas fermamaing.

Röven 8 es fich integrà

Daspö cha la gruppa da Chüra Röven 8 exista a Zernez, vain ella frequentada bain. Ils abitants da la gruppa sun fich integrats illa vita dal minchadi chi capita eir ourdvert dals mürs dal stabilimaint: Societats da musica, cors, otras societats e voluntaris pissern per vita in chasa. «In Engiadina Bassa daja trais gruppas da chüra: in Samigniuin, a Scuol e quella da Zernez. Tuottas funcziunan fich bain – la gronda part es però situada a l'ur dal cumün e perquai na uschè central e bain ragiundschiabla sco Röven 8 a Zernez», intuna Koppenberg.

Malcuntantezza daja a Zernez però eir: Uschè nu survegnan quellas persunas chi han fittà ün'abitaziun i'l cumplex dal stabilimaint da Röven 8, plü quellas sportas chi's vaivan miss avant e chi sun eir gnüdas missas in vista. La nouva ledscha da sandà, la quala es entrada in vigur precis cur cha Röven 8 ha drivi sias portas, nu lascha nempe plü pro cha la Gruppa da chüra s'occuppa eir dals abitants illas abitaziuns. «Perquai esa d'incleger cha tschertas persunas sun dischilluças», declera Schütz. Dal «abitar cun chüra» (Betretes Wohnen) nu's possa a Zernez in quel lö perquai discuorrer. «Però il Center da sandà spordscha üna soluziun: Ils servezzans da chüra, sco cusglianza, chüra ed agüd a chasa, pro abitants illas abitaziuns privatas da Röven 8 vegnan surtut dal post da cusglianza ed impustüt da la Spitex», conclüda Schütz.